

Pyar saba cir kaplāņ

Syaha fla

¹ Ndoos Pyar kē, ndooos wii n ma Yesu Crise tēnlēhē. N saba nwo yrūhū ye kē, yii mpāy Yāhā ye yāņ yi, yii mpāy ye cāāņ nii Pōn kāntraha na, Galasyi kāntraha ne, Kapada kāntraha ne, Yasyi kāntraha ne, ma suhu Bitini kāntraha ne. Ye ma nampay mpāy wo, pe wee Yesu kānde wo ye. ² Faale wo, Yāhā bii ye wāyāņyi wī ta, ma -sē bii ye yāņ yi. Yāhā Yrā kāmāy na, Yāhā ye laam wā klaha, ye n nii ke wām. Loo na, ye n waha naa n luhu Yesu Crise kaplāņ ye, tesē u ntāņ n waha ye kapee- yee laha kāā ye na gbēgbē. Yāhā ke ke laantār wī pye ye kē, ke maha yrīņ wāā ye kē.

Yesu kāndeyārfua u ya wāsyayaha wī cā wa

³ Yāhā gii ke ma wo Yīņfua Yesu Crise Tuhufua, -too naa ke sey! Yāhā wo fēn di, ma wo ta wo n gbihi dur see laanfāyōm ne. Ke Yesu Crise ta u n yir gbā wo, ma dur ba yrāņ na gbaafa ye. Loo ne, wo n koho taha yaha Yesu na, ma yee wo ga ba cīinde yrā yāā Yesu kāmāy na, cīinde yrā lii wākuayāā wee le na ye. ⁴ Yāhā ke kloho gii gbihi ta yaha ke pii kē, wo ga maha ba ke yāā gbe yāhāyīņ fla wo. Koo kloho nge, wāfūhūyāā wee ke na ye, wāwluhuyāā wee ke na ye, ke nayōr saa maha kua yāā ye. ⁵ Yii mpāy tee Yesu ta ye Yater ma yee u fānga gboho, Yāhā fānga -sē ga

naa n sēŋ ye na driyē n sya ba kua, nawee- bye n ye wāsyayaha yāã yīnde ne.

⁶ Koo ngĩ wĩ na, -ye naa nuhu di! Wāfāy ter bye ma sya pye ye na, ma nii ye laam wlāhā ye kē yagaa nge na, ke saa ma- ye. ⁷ Koo wāfāy nge, ke ma mii ke ye tãn n yãŋ, ye ma pye ye Yesu ta ye Yater cĩnde. Sãn gε, u wĩ le ga waha kua kãã, u wĩ -sē waha nawee- ye. Ta n yee pe yai pe u le naawraŋ wo, pe wor yēy yi u wo, u n nii sãnyō? Tee Yesu ta ye Yater, le ma kayĩ, ma ter sãn gε yaha, le sē n tōr gε tōr ye. Kawlaŋ tesē wāfāy ne, ke ye dye ma ye tãn n yãŋ, le ma pye ye Yesu wāta wĩ ye Yater, le waha ye laam wo cĩnde. Le ma gboho ye laam wo cĩnde, Yesu ma ba dur ba per gii, ye ga ba sey tee miingbãŋ yāã. ⁸ Ye sē Yesu yāã yāã yīnde ne ye, u ntãŋ -sē dye ye tãy. Yagaa nge gε na, tuu sē sya wee gbaa na ye, ye u ta ye Yater, ma nii nuhu di kacãn wee te na ye. ⁹ Tee too nuhu di ke syi, ye cã ye Yesu ta ye Yater yĩŋ gii na, ye ga ba koo yĩŋ wĩ yāã, koo kē. Koo yĩŋ wĩ ne, ye ga ba sukũhũ gaa yāã, ye yrã bya ne.

¹⁰ Yāhā ke ga ba ye sya yaha koo wāfāy nge wo mii syi dyaŋ, faale Yāhā kaplãŋ tōrfa bii le fla kε. Yāhā ke ga ba kayĩ lii pye ye kē, pe bii le cãã tōr yaha. ¹¹ U Yāhā Yĩndefua Crise Yrã le -sē pye pe laam wo, le naa pe yar ma naa n yee, u Crise ga ba fāy gboho u cã u miingbãŋ yāã tesē u nayōr ne. Koo kai- ngĩ ke yai ke pye mii syi dyaŋ tesē ke wāpyeŋ cãã ne, pe Yāhā kaplãŋ tōrfa bii koo bye kε kayi ne. ¹² Yāhā n -sē bii pe yar ma yee, kai- nkāy koo ke yar pe na u Crise wĩ na, koo

kai- ngĩ saa pye pe yĩnde na ye, ke ga ba pye yii poo yai na. Ke pye wa yagaa. Mpāy pe ma loo kapāyĩ tōrfa nawee- ye, Yāhā Yrā Fānga ma pe ne, Yāhā Yrā lii Yāhā ke nɔ wāā pe ye. Koo kē pe n waha nii le Yesu kapāyĩ tōr ye ye. Pe yāhāyĩ tēnlhe ge naa loo nde wācāᅇ ke.

-Too naa wo miingbāᅇ kānde yār!

¹³ Loo ne, ta n ye yar: -Ye ye laam gbihi ta, ye naa Yāhā wūhū pye! -Ye naa yersaha ta ye pyer na! Yesu Crise tuu ga ba dur ba ye kē kayĩ lii ne, -ye koho taha yaha loo ya na! ¹⁴ -Ye naa n luhu Yāhā ye mii kicar dyaᅇ pe tuhufua ne! Tee sē ba Yesu cā wa ye, ma naa kapee- nkāy pye, -ye ke miy yaha!

¹⁵ Yāhā gii ke ye yee, ke kai- laha. -Ye naa n laha ye kānkai- bye wo mii Yāhā wāᅇ syi dyaᅇ!

¹⁶ Le sē yrūhū la Yāhā sabangbāᅇ wo ma yee, Yāhā yee:

«Ta kai- laha, ye bya -ye naa n laha

ye kānkai- bye wo ta wāᅇ syi dyaᅇ!»

¹⁷ Ye ma nii n pāā Yāhā ne, ye ne naa ke yee wo Tuhufua Yāhā. Tee ke yee ke syi, -ye naa ke myaha gboho ye kānkai- bye wo, ye ta ye pyer naa n sroᅇ ke kaplāᅇ ne! -Ye naa n nii koo syi ya driyē wo, ye kuper n sya ba nɔ. Ye sē yāā, Yāhā wo nanem bye sāhā wo pyer wĩ na wii wuhu na, nawee- wātyōr wee ye. ¹⁸ Ye cā Yesu ye par sya yi kāā ye wāle wākapyeᅇ kānde wo, kānde lii pe bii yar ye na. Yesu Crise u ye par sya ngii ne, ke syi sē n tōr wale ne ye, ke sē waha n tōr kla gii goo syi ne ke n klaha- ye. ¹⁹ U ntāᅇ wāwoo u ta ma ye yĩᅇ par sya. U Yāhā Yĩndefua Crise

gbã ku mpar draha wo mii mbapēñ gii syi dyañ ke teelaa sē klaha- ye, ke sē maha wee teele laa ne fla ngaa na ye. ²⁰ Driyē ɣe sē bii tãhã wa ye, Yãhã -sē bii u Crise yãñ yi ta wa. Yagaa, driyē ke n gaha kuasaha wo, Yãhã u gbe yi yar ye na, u ye sya yaha. ²¹ Yesu woo kē u ye ta ye n Yãhã ta ye Yater, ma maha koho taha yaha ke na. Yãhã kē ke Yesu ta u n yir gbã wo, ma dur ba yrãñ na gbaafa ye. Loo kur ye, ke n nagboho ta u na, ma u ta u n dugu ga nii yãhãyĩñ na ke tãy ke kãndigi koho kuɛ ye. Le nii Yãhã ɣe kē, tee ta ye Yater, ma maha koho taha yaha koo ya na.

²² Tee Yãhã cĩnde kapãn maha yigi, ye ye laam yee laha wa gbɛgbɛ. Loo nde ye ta, mpãy byɛ pe Yesu kãnde yãr, pe ntãñ ga waha dye ye tãy. Ta n ye yar, ye tyii ye ntãñ n sron naa n dye yii tãy, ye wĩ n gboho yii laam wo! ²³ Ye sē yãã, ye ma mii ye gbihi dur see laanfãyõm ne. N sē yee, ye see yi nawee pua wo ye. Ye see yi cĩnde yrã pua wo, loo lii le ma Yãhã kapãn, lii le cĩnde yrã wãã nawee kē. Yãhã kapãn loo na, wãkuayãã wee le na mii nawee kadye dyañ ye. ²⁴ Yãhã sabangbãñ ɣe wo, le ma le yrũhũ yaha ma yee:

«Nawee- byɛ ma mii nyē wãñ ter syi dyañ,

pe nayõr ma mii katyigi fyãr dyañ.

Nyē sē ne ba waha tãñ la ke ku?

Katyigi fyãr sē ne ba too la te nayõr ne,

te wĩ n kua kãã?

²⁵ Ma sē yee, wo Yĩñfua kapãn loo na,

le ga naa n nii yalebyɛ,

wãkuayãã wee le na ye.»

Loo kapãn nde ne, le ma Yesu kapãyĩ lii le tõr yar ye na.

2

Yāhā ke ntēmlaha gi ta

¹ Loo na, -ye ye laampee wūhū bye miy yaha, ye ma n fufor pye ye, ye ma n ye nampyeŋ wlan le kapee wo ye, ye ma n nii yīnkāhā sānsyāŋ ne ye, ye ma n naa yīnde pye ye, ye ma n wāpee pāā waa wī na ye! ² Ye cā yīm n tāy pēyāhā ye, u yīm wār ma n ɛ. Ye bya, -ye nii pēyāhā wāŋ ter syi dyaŋ, -tee ta Yāhā kapān wī naa n tāy ye ye, le Yāhā kapān lii le sroŋ, ma laha, kapee carle laa gɛ sē wlāhā le wo ye. -Ye le le naa n yaha ye laam wo yalebye! Loo na, Yāhā cīnde wī ga gboho ye laam wo, ye n ɛ Yāhā kānde wo. ³ Ye Yīŋfua wī cā, ma maha u laantār wūhū yāā gboho, ma cā ye wī gboho u laam wo.

⁴ -Ye yūhū dye Yīŋfua Yesu tāy! U sē ku ye, u ma yrāŋ na, woo kē nwoŋ nakūy ntēmlaha Yāhā ye. Nawee- u sye, pe sē u ta ngaa ye. Yāhā -sē cāā bii woo yāŋ yi, ma yee u ter wān bye yaha. ⁵ -Ye yūhū dye Yesu tāy, tee tyii Yāhā n ye ta ke kangbāŋ fāā ye ne, Yāhā Yrā n dye nii ke wo. Yii tee ga maha ba nii koo Yāhā kangbāŋ nge yūndefa, ye naa ke sey ye laam fānga bye ne, tee yii le soho ke koho wo ye kuāŋ ne mii diŋ wāŋ syi dyaŋ. Ye ga ba naa koo pye Yesu Crise myaha ne, loo le ga naa n tāy Yāhā ye. ⁶ Yāhā sabangbāŋ wo, le ma le yrūhū ta ma yee, Yāhā yee:

«-Ye yāŋ, n nwo,

tē cāā nwonfāā ntēmbangbāŋ gaa yāŋ yi ta klo nde wo pe n yee Yurusalem.

Koo ke ma ke nwoŋ yīŋ.

Ntēmbar nde bye ga ba fāā tā taha koo na.

Ke ter wān bye yaha.

Koo kē tē yāŋ yi.

Wii ma koo ntēmbangbāŋ nge wīi sya cīinde,
fyar wīi laa saa ufua dye yāā ye.»

⁷ Yii mpāy tee ke wīi sya cīinde, ke ma ye ye yīŋ
ne, ke ter wān bye yaha. Ma -sē yee mpāy na, pe
sē ke wīi sya cīinde ye, yīŋ wee ke na poo ye ye.
Le ma le yrūhū ta Yāhā sabangbāŋ wo ma yee:

«Ntēmlaha gii nwonfāāfa ke sye,
Yāhā ke gbe ma ke ta,
ke n sya yīŋ yāā ke nwonfāā na.»

⁸ Le maha yrūhū ta ma yee:

«Koo ntēmlaha kē,
nawee- mpāy n pai naa n kūn ke na,
pe laha naa n too.»

Pe Yāhā kapāyīi sye, loo ne pe n kūn ke na, ma n
too. Yāhā le ta ke syi.

⁹ Yii poo na, tee Yesu wīi sya cīinde, Yāhā ye
yāŋ yi. Ye ma u Yīŋfua yūndefa. Yāhā ye ter yāŋ
yi ma ye ta ke wām, ye kānkai- n naa n laha.
Yāhā ye yee yi wam wo, ma ba ye le ke cāā- wo,
cāā- mpāy kacān wee pe nayōr na ye. Ke ye yāŋ
yi, ma yee ye naa Yāhā kayūhū yar nawee- na.

¹⁰ Faale wo, ye sē pye Yāhā wām ye. Yagaa woo,
ye ma Yāhā wām. Faale wo, ye sē ba cā ma yee
Yāhā ye fēn di ye. Yagaa tee -sē le cā, ye Yāhā
kayīi yāā.

Yāhā tēntēfua yai u naa n pye mii?

¹¹ Ta naambiyām, n ye nar laa ne. Ye cā ye ma
nampay driyē nge wo, plii raa ya tee ga pye ke
wo. Loo na, ye laam wūhū nkāy ke sē n gaha
Yāhā kue ye ye, -ye ke miy yaha, ke ma n naa ye

wlāhā ye saha Yāhā laam wīl pye ye. ¹² Mpāy pe sē Yāhā cā ye, tee mii ye wlāhā nii pe laam wo, -ye ta ye pyer n yō! Pe ma sya kawar fua n taha ye na, ma yee ye ma kapeepyefa, pe yīnde ma ye kayūhū na tee n pye. Ke syi ne, Yāhā ma ke yīn yi pe ye per gii, ye kayūhū ga ta pe n ke sey.

¹³ Tee mii tee Yīnfua Yesu kānde yār, -ye yīn kor naa n le yīnfa ter bye ye kāntraha nge na! Tee naa n luhu ye kāntraha yīnfua ye, woo wii fānga kur bye ma u koho wo! ¹⁴ U yīnfua tuu mpāy yān yi, ma pe taha yīn na u kāntraha kui bye wo, -ye naa n luhu pe bya ye! Poo mpāy, nawee ma kapee pye, pe ga u pēn, wii ma -sē kayī pye, pe ga u sey. ¹⁵ Ye sē yāā, Yāhā n ke ye naa kayūhū pye, ye ta, mpāy pe sē n ke pe kai- cā ye, tesē mpāy ne pe plege, pe ma n waha naa wāpee pāā ye wīl na ye. ¹⁶ Yagaa, ye yi kāā yāmpar raa ter fānga koho wo. Loo na, lii ma tāy ye ye, ye ga waha loo yān gbe. N sē -sē yee, ye kapee- wāpyeṅ kānde loo gbe ye wāsyayaha flāhā tāy ye. -Ye naa ye troho tāhā nawee- n waha cā, cīnde Yāhā tēntē- me ye ne. ¹⁷ -Ye naa nagboho ta nawee- bye na; mpāy bye pe ma Yesu kāndeyārfa, ye tyii pe ntān n naa n dye ye tāy; -ye naa n fya Yāhā koo na, -ye naa n luhu nawee- yīnfuangbān ye!

-Ye naa n yān ye Yāhā Yīndefua Crise na!

¹⁸ Tēntē-, -ye yīn kor naa n le yīnfa kē, -tee naa n fya pe na! Mpāy pe ma ye yīnfa, pe ma naweeyōm woo, -ye naa n luhu pe ye, pe wee naweeyōm woo, -ye naa n luhu pe ye! ¹⁹ Ye sē yāā, taa sē yai wāfāy gii ne ye, pe ma ma fāy koo

wāfāy nge ne, ma sē le ta kai ye, cā ma n luhu Yāhā ye. Ma'a n pye ke syi, ma pyer n tāy Yāhā ye. ²⁰ Ye sē yāā, ke ma pye ye kapee pye cīinde, pe n ye yigi ma nii ye fāy le wī na, le yai ye ne, ye saha laa wāyī yāā koo wāfāy na ye. Ke ma -sē pye ye kayī pye, pe n ye yigi ma nii ye nuhu le wī na, ye n yī ta le sē kai kua ye ye ye, ye ga wāyī yāā le na Yāhā ye. ²¹ Ye sē yāā, Yāhā lii ke ye ye, ye naa ye laam yīn wāfāy wo. -Ye yāᅇ, u Yāhā Yīndefua Crise ge ke syi wāfāy yāā ye wī na, ma yee tee naa n yāᅇ woo na, ye naa ye troho tāhā u wāᅇ ter syi dyaᅇ.

²² U sē kapee laa syi ge pye yāā ye, kawar wī laa sē yi yāā u yē wo ye. ²³ U pye, wii ma u tyehē, u saa kapāmpēe dur wāā ufua kē ye. U pye, pe ma sya u nuhu mii, u saa yee u ga wāpēe pye pefa na ye, u ga u ya le soho Yāhā koho wo, Yāhā gii ke nawee sāhā cīinde ne. ²⁴ U Crise wo kapee-kur byē sya, ma tēᅇ u yīᅇ na, pe n sya ga u kuey mar trā na, u n ku ke ne. U loo pye ma wo ta, wo n nii nakur wāᅇ syi dyaᅇ kapee- wāpyeᅇ kue ye, ma -sē nii yrāᅇ na, ma ga waha naa kai nkāy pye nkāy ke sroᅇ. Pe Yesu tee duai, u n le sya laanyīn ne. Loo ta, kapee- nkāy byē pe tee pye wo na faale wo, koo kayaaᅇ n kua wo laam wo, wo n maha kadye korkor yāā. ²⁵ Ye sē yāā, faale wo, ye pye mii mbaa dyaᅇ pe yi kāā u mbanaha kur ye ma -sē plaha. Yagaa, ye wee ke syi nantāᅇ ye. Ye dur ba u mbanaha ye, u n nii n sēᅇ ye na.

3

Ca tesē pe pa ne

¹ Ca, yii nanem bye, -ye yĩfar wãã ye pa kē, -ye naa n luhu pe ye! Loo ga ta, ye pa mpãy ma sya Yãhã kaplãŋ sye, pe ma ye troho wãtãhã ter yãã ke yõ, ma maha sron, loo ga waha pe ta pe bya n Yãhã kaplãŋ sya cĩinde. Ye saa yii fãy yẽ kapãn ge ne ye. ² Poo ge ma ye troho wãtãhã ter yãã, mii le Yãhã kãnde le yar mii, ma maha yãã ye nagboho ya ta pe na, pe ga sya pe naa pe troho tãhã Yãhã yor wo pe ya ndon.

³ Ye ma syi yii ta ye naa ye kadye ya wãgbihi ke, nawee- yĩnde n yi naa n too ye na ye, mii ye yĩnyor wãgbihi dyan nsãasugu ne, sãn kãncrãŋ ngĩ syi wãleŋ ne tesẽ nayreyõr wãleŋ ne. ⁴ Ye yai ye ye laam poo gbihi, pe n yõ pe ter ye kadye sale yaha. Ye laam ma pye pe yõ, ma maha ma laanyĩn, too syi nayõr nde wee wãkua wãn ye. Loo le ma kayĩ Yãhã ye. ⁵ Faalefasyam mpãy pe naa Yãhã kãnde yãr, ma Yãhã ta pe Yater, pe naa pe nayõr ke koo syi; pe ba pe yĩfar wãã pe pa kē, ma naa n luhu pe ye. ⁶ Faalefasya Sara pye koo syi. U naa u troho tãhã u puai Brama yor wo, ma sya naa u yee: «Ta yĩnfua.» Yagaa ya'a nii n sron, ye ma woo Sara pueesyam. Ye saa naa n fya laa na ye.

⁷ Pa, yii bye, -ye laantor yãã ye ca kue ye kãnkai- bye wo, tee cã wa fãnga wee pe na ye. -Ye naa nagboho ta pe na; Yãhã kayĩ lii wãã ye kē, ke le wãã poo bye kē, loo kayĩ ne le cĩinde yrã wãyãã ne. Mboo wii ma yee ma sã laantor yãã ma cõo kue ye kãnkai- bye wo ye, ye ma ba nii Yãhã nar ye syãm, ke saa luhu ye kaplãŋ ye ye.

Yesu kãndeyãrfa yai pe naa kasron pye wãfãy wo

⁸ Yagaa, tẽ ga lii pãã ye byε ye, -ye naa nii yĩmbui nen na, tee naa n nii laantee nen ne. Ye byε, ye tyii ye ntãñ n naa n dye yii tãy mii tuhufua nen pii wãñ syi dyañ. Ye tyii ye laam n naa n tãy yii ne, waa ma syi u naa u ya puar u nampyeñ na ye! ⁹ Waa ma kapee laa pye ye na, ye ma syi ye le dur ufua kẽ ye. Wii ma ye tyehε, ye ma syi ye le dur ufua kẽ ye! Ye tyii le n kua kãã ye laam wo, -tee maha Yãhã nar, ke n kaa goo taha u na. Yãhã ye yãñ yi ye naa ye troho tãhã koo syi, ma yee ke ga ba kaa taha ye na. ¹⁰ Le ma le yrũhũ yaha Yãhã sabangbãñ wo ma yee:

«Wii ma yee driyẽ ke tãy woo na,

yay diplii n syar u ye,

ufua yai u kaplãmpee- wãpãã miy yaha

tesẽ kawar wãfua ne.

¹¹ U yai u kur waa kapee- na,

tuu kayĩ loo maha yĩñ klue sũ,

tuu naa yrĩñ poo ke u nampyeñ- ne yalebyε.

¹² Ye cã,

Yĩñfua yĩnde ma mpãy na pe kasron pye.

U pe Yãhã wãnar yĩmbui luhu yalebyε.

Mpãy pe -sẽ kapee- pye,

Yãhã yer n tã poo na.»

¹³ Yoo ga waha yee, ye ma kasron pyefa, tuu kapee laa pye ye na loo nde wĩ na? ¹⁴ Ye ma kasron wãpyeñ maha yigi, ma -sẽ ba wãfãy yãã loo kur ye, ye cã ye yee, Yãhã ga kaa taha ye na. Ye ma syi ye naa n fya nawee- na laa ne ye, ye ma syi waa n naa ye laam wlãhã ye! ¹⁵ -Ye naa u

Yāhā Yīndefua Crise woo ya gboho ye laam wo, woo kē u ma ye Yīnfua. Tee koho taha yaha Yesu na, mpāy ga ba naa ye yey kai- ne le wīl na. Ye yai ye pe yē wāā sya, ye pe yar ye koho wātahayaha wīl ne Yesu na. ¹⁶ Ye ma ga pe yē wāā sya, -ye -sē naa nagboho ta pe na ye yē kaplāŋ ne, ye naa ye laam yīn pe ne, ye pe gbihi yar! Ye tyii ye laam n tege nii! Ke syi ne, kānsron lii Yesu le yar ye na, ye n nii le yār woo kāmāy na, mpāy ma yee ye tee pye, ma nii wāpee pāā ye kānsron wāyār wīl na, fyar ga pe yigi pe kaplāŋ ne. ¹⁷ Le ma pye, Yāhā laam wīl ne wo wāfāy yāā, wo -sē koo wāfāy yāā kayīl wāpyeŋ kur ye. Koo puar wo koo wāfāy yāā kapee wāpyeŋ kur ye.

¹⁸ Ye sē yāā, u Crise gε le sya ma ku wo kapee-wīl na. U poo gbā ku tεhe nen ya, ma -sē wo kapee- kuā kāā wo yīŋ na u kuāŋ ne. Woo wii tuu sron, u le sya ma ku kapeepyefa wīl na, ma yee pe waha wāā le Yāhā ne. Pe u kadye boo, Yāhā Yrā n u ta u n yir gbā wo, ma dur ba yrāŋ na gbaafa ye. ¹⁹ Loo Yāhā Yrā ne, le u ta u n ka maa le Yāhā kapāyīl pāā mpāy ye pe ku ter wa, pe pye mii nwompihifa dyaŋ fla ngii na pe ma. ²⁰ Poo nawee- pye faale wo Nuwε cāā na. Pe bii sye pe sē luhu Yāhā ye ye. Ke pe kuε yāŋ yāŋ laa, Nuwε n sya bii ke salangbāŋ fāā kua. Mpāy pe bii luhu Yāhā kapān ye, pe pye nawee- kuatāā ya. Poo nawee- kuatāā mii n dye ke salangbāŋ wo, ma sya yaha ke loho wo. ²¹ Koo loho nge sē nii la mii yagaa wātāāyi dyaŋ loho wo, ke ye sya yaha wa: Ye sē tāā yi koo loho wo ma yee ye ga ye kadye wey laha ye. Ye loo pye ma yee ye Yāhā nar, ke ye laam yee laha ye kē gbεgbe. Yesu

Crise tuu ku ma yir gbã wo, ma dur ba yrãŋ na gbaafa ye, loo ya le ta, koo wãtããyi loho nge n waha ye sya yaha. ²² Yesu Crise ka yãhãyiŋ na, u ma u nii Yãhã kãndigi koho kuε ye, kai- byε yiŋ na. Yãhãyiŋ tẽnlehe, sãndãã ter byε ne tesẽ fãnga ter byε ne, pe byε yiŋ kor le u kẽ.

4

-Ye ye faale laampee miy yaha, -tee laanfãyõm gbe!

¹ Ye cã ma yee, Yesu Crise kadye sraha wãfãy sron yãã. Ye bya -ye ye laam gbihi ta, ye yii waha koo wãfãy ter syi nge na, ye naa n yãŋ Yesu na! Ye sã yãã, wii woo tuu yer u ya kadye sraha wãfãy wĩ na ma fãy, woofua koho yi kãã kapee-wãpyeŋ wo. ² Ma gbe nanga na, ye laam wũhũ nkãy ke sã yõ ye, -ye koo miy yaha, ye naa Yãhã laam wũhũ koo pye, ye sya ba ku! ³ Mpãy pe sã Yãhã cã ye, cãã ngii cãã tee sã ba Yesu cã wa ye, ye naa ye troho tãhã pe wãŋ ter syi dyaŋ. Ye sã waha naa yii yigi ye, ye laam wũhũ sã ba yõ ye. Ye pye sẽnwonafãan. Plii byε ye naa yii wãã gbar na, ma ga naa sēm wo. Nkãy syi ke fũhũ Yãhã ye, ye naa koo pye, ma naa ye mpar wãn tẽŋ. Ye tyii ye koo ngĩ byε wãpyeŋ miy yaha, ye ma- ter ke wãpyeŋ na. ⁴ Yagaa, mpãy pe sã Yãhã cã ye, pe yãã tee ye troho yi kãã pe kãmpee wo, loo nde pe fe gbe, pe n sya nii ye tyehε. ⁵ Per gaa -sã ma ke n pai, le yale nɔ wa gε nɔ wa, Yãhã ga ba pe yee, ke pe yey pe naa kapee- ngĩ byε pye, ma maha naa ye tyehε yiŋ gii na. Yãhã ke per gii ta, ke n pai nakur sãhã tesẽ yrãŋfa byε ne, ye cã koo per sã

dey kuee ye. ⁶ Ye sē yāã, mpây bya pe ku wa pe bii le Yāhã kapâyĩ luhu pe ya ndoŋ. Kai- nkây pe bii tee pye, pe wāpēn yāã koo wĩ na. Yāhã Yrã -sē wāsyayaha wĩ yar pe na le Yāhã kapâyĩ kāmāy na, le n waha pe ta pe n cĩinde yrã yāã, lii wākuayāã wee le na ye.

-Ye ye Yāhã kayĩ ta Yesu kāndeyārfa wāyōŋ wĩ na!

⁷ Driyē wākua yale nɔ gbe taha. Loo na, -ye kacān yāã, ye yersaha ta ye pyer na, ye waha naa Yāhã nar. ⁸ Kai lii le -sē ma yĩŋ, loo ne nde: Ye tyii ye ntāŋ n sroŋ naa n dye yii tāy busāã. Ye sē yāã, wii ntāŋ ma dye ma tāy, ufua ma sya lii tee pye ma na, u ntāŋ wādye wĩ ga ta, ma n le wāpee yee yi kãã ma laam wo, le n kua gbegbe. ⁹ Wii ma ka ma kaha wo, niisaha wāã u kē, loho ne u n wo, ma'a n yĩntaha tāhã u ne ye, ma'a n maha yee, u wāpa wĩ sē tāy ma ye ye. ¹⁰ Yāhã ke fānga tii la ye nanem bye kē, -ye cā ye yee, ye yai ye te ta, te n laa yō Yesu kāndeyārfa bye kē. Ya'a nii koo pye, ye te wāyigi cā cĩinde. ¹¹ Wii ma kaplāŋ tersaha cā, ma nii Yāhã kaplāŋ tōr n yar nawee- na, fānga gaa kē Yāhã wāã u kē. U ma nii Yāhã kaplāŋ tōr nawee- ye, u -sē naa Yāhã kaplāŋ ya tersaha yar nawee- na. Wii ma koho wāleŋ cā u nampyeŋ ye, ma nii koho le nawee- bye ye, fānga gaa kē Yāhã wāã u kē. U -sē naa koho le u nampyeŋ ye koo syi. U -sē naa n pye koo syi, Yāhã myaha n gboho kānkai- bye wo Yesu Crise kāmāy na. Ye sē yāã, kai- bye fānga ma tāŋ Yāhã koho wo nayōr ne. Wākuayāã wee yāã koo ngĩ na ye. Amen, le nii ke syi.

Ye ma wāfāy yāā Yesu wīl na, ye tyii le n naa n tāy ye ye!

¹² Ta naambiyām, Yāhā ke ye tăn n yāŋ wāfāy gii ne yagaa, ye ma syi le n ye fe gbe, le nii ye ye kafuē laa ye, lii syi le sē yai le ye dye ye. ¹³ Tee mii, ye wāfāy yāā, ye tyii le n nii ye ye nuhu wīl! Ye sē yāā, u Yāhā Yīndefua Crise wāfāy ter kē tee n sya. Loo na, u maa dur ba u nayōr ne nawee-byε yīnde na, le ga ba nii ye bya ye laanfīr wīl.

¹⁴ Ya'a yāā, pe ye tyεε Yesu kānde wāyār wīl na, -ye ta le n nuhu yigi ye kē. Ye sē yāā, Yāhā Yrā ma ye na, ma ta Yāhā nayōr yirfua ma ye na. ¹⁵ Yii waa ma syi u wāfāy yāā kapee laa wāpyeŋ kur ye mii nawee wāboo dyaŋ, laa na kla gaa wāyuhu, laa na kapee laa ter wīl na tesē nagblaha wīl laa ne ye. ¹⁶ Pe ma -sē nii yii waa fāy, ma yee u ma Yesu kāndeyārfua, ufua ma syi u yee fyar woo yigi loo nde ne ye. U -sē naa Yāhā sey, koo gii ke u ta, u n waha u troho tāhā Yesu kānde wo.

¹⁷ Yale nɔ wa, Yāhā kasāhā ga yir yagaa. Ke ga cāā fe gbe Yāhā pii poo na. Wii mpāy too ma Yāhā pii, le ma -sē cāā fe gbe wii na mma ma syi dyaŋ, mpāy pe le Yāhā kapāyīl sye, poo wīl -sē ga ba nii mii? ¹⁸ Ye sē yāā,

mpāy pe sron,
pe yīŋ wāwlohoyi wīl ma war,
mpāy pe pee tesē kapeepyefa ne,
poo wīl -sē ga ba nii mii?

¹⁹ Loo na, mpāy pe wāfāy yāā Yāhā kuε koho na, pe yai pe kuee kayūhū ya wāpyeŋ wo, pe pe ya le soho pe kuāŋ ne Yāhā koho wo, Yāhā gii ke wān kur byε tāhā, koo gii ke ma yē ter wo ye lii ne, ke ga le pye wo kē.

5

-Ye Yesu kãndeyãrfa yigi yõ, ye naa n sêḅ pe na!

¹ Yii mpãy tee ma Yesu kãndeyãrfa yahaseefa, yii me tẽ n yãḅ yagaa. Ta bya, n ma Yesu kãndeyãrfa yahaseefua nii ndoḅ. U Yãhã Yĩndefua Crise tuu wãfãy gii fãy, n ke yãã yĩnde ne. U ma ba dur ba u nayõr ne tesẽ u fãnga ne, ta bya ga ba koo yãã u flãhã tãy nii ndoḅ. Tẽ yee n ga lii pãã ye ye, loo ne nde: ² Yãhã ke Yesu kãndeyãrfa mpãy le soho ye koho wo, -ye pe yigi yõ! -Ye naa pe yãḅ ye naa n sêḅ pe na, mii mbanaha dyaḅ u mbaa ne. Tee le ta le n nii ye laam wĩ, ye ma syi ta le n nii ye ye fãnga wĩ laa ye. Loo le n tãy Yãhã ye. -Ye naa koo ngĩ pye pe kẽ ke dyaḅ laantee nen ne, ye ma n naa wale wĩ wũ le wo ye! ³ Yesu kãndeyãrfa mpãy pe ma ye koho wo, -ye naa n sêḅ pe na! Ye ma syi ye yii ta ye kuã tã pe na ye, -ye nii pe ye cĩnde yahaseefayõm, pe n waha naa n yãḅ ye na. ⁴ Ye ma nii ye troho tãhã ke syi, Yesu Crise wii u n sêḅ wo bye na, mii mbanaha dyaḅ u mbaa ne, u ma ba dur ba, u ga ba kayũhũ gaa wãã ye kẽ, kii syi ke ma myaha ne, wãkuayãã wee ke nayõr na ye.

⁵ Naanfãm, -ye yĩḅ kor naa n le yahaseefa kẽ! Ye bye, yii naanfãm tesẽ wãle ne, waa ma syi u naa u ya puar waa na ye; -ye naa kayũhũ pye yii kẽ! Yãhã sabangbãḅ ge laam wo, le ma le yrũhũ ta nii ma yee:

«Yatanfa wĩ sye Yãhã ye.

Mpãy pe -sẽ pe ya tege tãã ye,

Yãhã ke laantãr yar pe na.»

⁶ Loo na, -ye yii tege tãã ye Yãhã yĩnde na, koo gii ke ma fãnga ne. Ye ma loo pye, Yãhã ga ba yalaale yãŋ, ke ye kuã yir ncaha ye. ⁷ Ye laam wũhũ nkãy bye ke ye fãy, -ye ke bye ta ke n nii koo yĩŋ wũhũ. Ye sê yãã, koo kê ke n sêŋ ye na.

⁸ -Ye naa ye laam wũũ, ya'a n faha yii yaha ye! Ye sê yãã, ye napĩ Setane ma mii jar wãŋ syi dyaŋ, tuu n syii ma gbey n klaha, ma n ke u ma wii yãã yigi u u kaa. ⁹ -Ye yii waha ye u wĩ sye, -ye Yesu ya ta ye Yater, Setane ma n ye yãã yigi ye! Ye cã ma yee driyẽ kur bye wo, ye nampyeŋ- mpãy pe n yãr Yesu kãnde wo, pe bya ma koo wãfãy nge na ye wãŋ syi dyaŋ. ¹⁰ Ye ma faa fãy car, yalaale ma ba no, Yãhã gii ke kayũhũ ter bye wãã nawee kê, ke ga dye ye ye, ke ye ta ye n kuee yai tãŋ ke nayõr wo, ye seefar rii wĩ na tee le Yesu ne. Yãhã ga ye ta ye n nii nawee-mpãy syi ke n ke. Ke ga ye ta ye n le ke kãnde wo. Ke ga fãnga wãã ye kê. Ke ga maha ye ta ye n kuee le Yesu kãnde wo laantee nen ne. ¹¹ Yãhã ya kê, ke ma fãngafua, wãkuayãã wee ke fãnga na ye. Amen, le nii ke syi.

Ke kaplãŋ kuasaha fla tesê syaha ne

¹² Silaasyi kê tuu ra koho soho, ta n waha sabagberle nwo yrũhũ ma no wãã ye kê. Tẽ lii yãã u kue ye, u n sroŋ Yesu kãnde wo. N kaplãŋ ngĩ yrũhũ ye kê ma yee, n ga ye laam gbã, tẽ ye yar, ye n cã ye yee, lii tẽ tõr yar ye na saba nwo laam wo, loo ne le ma le cĩnde Yãhã laantãr wĩ. Yãhã loo wãã wo kê, -ye le gbihi le yaha ye laam wo!

13 Yesu kãndeyãrfa yawãhãfa mpãy pe ma Babilon wo, poo mpãy Yãhã pe yãñ yi ye wãñ syi dyañ, pe bye ye syar. Mareke wii u nii ra dya Yesu kãnde wo, u bya syaha wãã ye kã. 14 -Ye naa syaha wãã yii kã, mii tuhufua nen pii wãñ syi dyañ pe ntãñ dye pe ya tãy. Yãhã ke yrĩñ wãã ye bye kã, yii mpãy tee seefar le u Yãhã Yĩndefua Crise ne.

YĀHĀ NAAMBIYĀRFĀN SABA
Karaboro, Eastern: YĀHĀ NAAMBIYĀRFĀN SABA
New Testament

copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

PDF generated using Haiola and XeLaTeX on 22 Feb 2024 from source
files dated 29 Jan 2022

15120496-00e2-503a-8d40-2d7cfdc1ba5b